

मार्निंग डोगरी न्यूज़ बुलेटिन,

समा. 09.20 Hrs

<><><><><><><><><><><><>

Headlines

1. लैफ्टिनेंट गवर्नर मनोज सिन्हा होरें आतंकवादी ढांचे दे समूलचे नास लेई जम्मू च केन्द्र शासत प्रदेश स्तर दे सुरक्षा सम्मेलन दी प्रधानता कीती ते संगठित कारवाइयें दी जरूरतें पर ज़ोर पाया।
2. राई-बाई मैहकमे दे मंत्री जावेद अहमद डार होरें जम्मू च बक्ख-बक्ख सरबंधत पक्खें दी इक बैठक लाइयै करसानें दे सशक्तिकरण ते बजारें दी मंग स्हाबै उत्पादन दे महत्वै पर लौस पाई।
3. जम्मू दे मौलाना आज़ाद स्टेडियम च कल 20 दिसम्बर गी पैहले-पैहले अंतराष्ट्री दंगल ते रुस्तम-ए-जम्मू-कश्मीर खिताब आली प्रतियोगिता दा आयोजन कीता जाहग।
4. जम्मू-कश्मीर दे एम्स विजयपुर च पैहला-पैहला Gen-Z डॉकखाना खोलेया गया ऐ- जेहड़ा डॉक सेवाएं च इक बड़ी डिजिटल पैहल ऐ।
5. जम्मू-कश्मीर दियें उच्चियें धारें पर 20 ते 21 दिसम्बर गी बर्फबारी दा अलर्ट- मौसम विभाग नै जातरा मतल्लक सलाह जारी कीती ऐ।

<><><><><><><><>

लैफ्टिनेंट गवर्नर मनोज सिन्हा होरें पुलसा दे ड़ैक्टर जनरलें ते इंस्पैक्टर जनरलें दी बैठक दी दर्ज उप्पर जम्मू च कल केन्द्र शासत प्रदेश स्तर दी सुरक्षा कांफ्रेंस दी प्रधानता कीती। इस सम्मेलन दा विशे-सार हा- “विकसित भारत- सुरक्षा सरबन्धी आयाम”। इस मौके पर एल.जी होरें आतंकवादी ढांचे की पूरी चालू तबाह करने लेई आतंकवादियें- उन्दे हिमायतियें ते मददगारें खलाफ सख्त कारवाई दी जरूरतें पर जोर पाया। एल.जी होरें आखेया जे पिछले 6एं बरे दौरान जम्मू-कश्मीर पुलस- फौज- खूफिया एजेंसियें ते केन्द्री थेहारबंद पुलस बले बश्कार तगड़े तालमेल दी बदौलत आतंकवादी हिंसा दे मामलें ते आतंकवादियें की भर्ती ते गिनतरी च बी बड़ी मती कमी दिखने की लब्बी ऐ। एल.जी होरें मती सरगर्मी कन्नै रणनीतियां बनाने सने Artificial Intelligence ते होरनें उन्नत तकनीकें की अपनाने की जरूरतें पर जोर पाया- तां जे सुरक्षा सरबन्धी नमीं उभारदी चुनौतियें दा मुकाबला कीता जाई सकै।

<><><><><><>

Dar Agriculture Meet

राई-बाई ते ग्रामीण विकास मंत्री जावेद अहमद डार होरें जम्मू दे तलाब तिल्लो इलाके दे किसान केन्द्र च बक्ख-बक्ख सरबन्धत धड़ें आले मंच की इक बैठक की सम्बोधित कीता। मंत्री होरें इस दरान करसानें- करसान उत्पादक संगठनं यानि एफ.पी.ओ- सरकारी मैहकमें- माली इदारें ते सिविल समाज बश्कार नेइमें सैहयोग की जरूरतें पर जोर पाया- तां जे राई-बाई ते एहदे नै जुड़े दे खेतरें दा विकास जकीनी बनाया जाई सकै। डार होरें करसानें की बाईखेत्यार बनाने- बजारें दियें जरूरतें स्हाबै उत्पादन की बढ़ावा देने- बिचौलियें की खत्म करने- सार्वजनिक ते

निजी सांझ-भ्याली गी बढ़ावा देने ते सरकारी योजनाएं गी बढ़ावा देने ते सरकारी योजनाएं बारे जागरुकता फैलाने दे बी निर्देश दिते। इस मौके पर मीडिया कन्ने गल्ल करदे होई मंत्री जावेद अहमद डार होरें आखेया.

<><><><><><>

G Ram G Bill

ग्रामीण इलाकें दे लोकें आस्तै रोजगार ते आजीविका मिशन (ग्रामीण) लेई नमें विकसित भारत गारंटी विधेयक -2025 दा सोआगत कीता ऐ- जेहदे तैहत रोजगार दे दिनें दी गारंटी 100 शा बधाइयै 125 दिन करी दिती गई ऐ। इस पैहलकदमी कन्ने आजीविका दी बेहतर सुरक्षा- स्थिर औंदन ते रोजमर्रा दी जरूरतें गी पूरा करने च मदद मिलने दी मेद ऐ। बसनीकें दा गलाना ऐ जे एहदे कन्ने ग्रामीण अर्थबवस्था गी बढ़ावा थोग ते ग्राएं च रोजगार दे मते मौके पैदा होगन। मते सारे लोकें सरकार दा धन्नवाद करदे होई आखेया जे रोजगार दी गारंटी च बाददे कन्ने जीवन स्तर च सुधार करने च मदद थोग।

<><><><><><>

Rustam-e-JK

जम्मू दे मौलाना आज़ाद स्टेडियम च कल 20 दिसम्बर गी पैहले-पैहले अंतराष्ट्रीय दंगल ते “रुस्तम-ए-जम्मू-कश्मीर” खिताब आली प्रतियोगिता दा आयोजन कीता जाहग- जिसी लेइयै खेड्ड प्रेमियें ते आम लोकें अंदर जबरदस्त उत्साह ऐ। जम्मू-कश्मीर खेड्ड काउंसल आसेया जम्मू-कश्मीर Indian Style Wrestling Association दे सैहयोग कन्ने आयोजित कीती जा'रदी इस

प्रतियोगिता दा मकसद युवाएं गी खेड़्डें बक्खी आकर्शित करदे होई सेहत ते तंदरुस्ती दी भावना गी बढ़ावा देना ते दंगल दी समृद्ध विरासत दा संरक्षण करना ऐ। Wrestling जिसी आम भाषा च कुश्ती- दंगल जां पलोआनी आखेया जंदा ऐ- ओह जम्मू दी सांस्कृतिक विरासत दा बड़ा महत्वपूर्ण हिस्सा ऐ। मकामी बसनीकें “रुस्तम-ए-जम्मू-कश्मीर” दे खिताब लेई होआ’रदी इस प्रतियोगिता गी लेइयै अपना जोश ते खुशी व्यक्त कीती ऐ।

ध्यानजोग ऐ जे पैहले इस दंगल दा आयोजन 17 दिसम्बर गी होना हा पर किश टकोदी वजहें करियै इसी अगड़ा पाई दिता गया।

<><><><><><>

Ist Gen –Z Post Office

जम्मू-कश्मीर नै एम्स विजयपुर परिसर च अपना पैहला जेन-ज़ेड डॉकघर खोलियै इक महत्वपूर्ण उपलब्धि हासल कीती ऐ। एह गैं सरकारी परिसरें च स्थापित डॉकघरें गी आधुनिक बनाने दे डॉक विभाग दे जतनें दा इक हिस्सा ऐ ते इस अभियान दा मकसद रिवायती डॉक सेवाएं गी नौजवानें दे मुताबिक ते तकनीकी समर्थ केन्द्रें च तब्दील करना ऐ। जेनरेशन-ज़ेड आस्तै तयार कीता गेदा डॉकघर इक आधुनिक माहौल- डिजिटल भुगतान विकल्प ते सख्खली सेवां प्रदान करदा ऐ। एह इक गै थाहरै पर डॉक- बैंकिंग ते बीमा सेवाएं दी सांझी पहुंच बी प्रदान करदा ऐ- जेहदे कन्नै विद्यार्थियें ते कर्मचारियें लेई एह मता सुविधाजनक होई जंदा ऐ।

<><><><><><>

जम्मू-कश्मीर च नीति आयोग दे सैहयोग कन्नै व्यापक सुधार सरबन्धी खाका तयार करने आस्तै सेहत सेवाएं दा बड्डा विस्तार जल्द गै दिक्खने गी लब्बोग। जम्मू च नीति आयोग दे सदस्य डाक्टर वी.के. पॉल हुंदे कन्नै लग्गी दी इक उच्ची सतह दी बैठक दौरान इस योजना पर चर्चा कीती गई। इस योजना दा मकसद समूलचे केन्द्र शासित प्रदेश च रणनीतिक हस्तक्षेप-तकनीकी एकीकरण ते समर्थ निर्माण दे राएं सेहत सेवाएं गी निग्गर करना ऐ। डॉ- पॉल होरें समें-सिर योजना गी लागू करने लेई पूरे समर्थन दा भरोसा दोआया। इस मौके पर मौजूद मुख सचिव अटल इल्लू होरें सीनियर फैकल्टी गी बरकरार रखने ते दूर-दरेडे ते सरहदी इलाके च विशेष सेहत सेवाएं दा विस्तार करने दी जरूरत पर जोर पाया।

<><><><><><>

Div. Com NH

जम्मू दे डिवीजनल कमीशनर रमेश कुमार होरें खिते च राश्ट्री जरनैली सिड़कें आली बड्डी परियोजनाएं दे कम्मै च हासल प्रगति दा जायजा लैता ऐ। एकड़ी परियोजनाएं च दिल्ली-अमृतसर-कटड़ा एक्सप्रेस-वे- जम्मू -पुंछ राश्ट्री जरनैली सिड़क ते NHAI- NHIDCL ते BRO आसेया तोढ़ चाढ़े जा'रदे होरने महत्वपूर्ण सिड़कें सरबन्धी कम्म शामिल न। उनें भगवती नगर आले फलाई-ओवर दे कम्म गी तौले सबूरा करने ते जम्मू-पुंछ जरनैली सिड़कें पर गधरवन सुरंग दियें दौने ट्यूबें गी खोलने दे निर्देश जारी कीते। बैठक दरान परियोजनाएं लेई जिमीं हासल करने ते जंगलात मैहकमे दियां मंजूरियां हासल करने सरबन्धी मामलें पर बी चर्चा कीती गई।

<><><><><><>

Weather

मौसम विभाग केन्द्र नै अज्ज समूलचे जम्मू-कश्मीर च बद्दल छाए दे रौहने दी पेशगोई कीती ऐ। उच्ची थ्हरें आहले इलाकें च खासतौरा पर 20 जां 21 दिसम्बर गी हौली थमां दरम्यानें दर्जे दी बर्फबारी होने दी संभावना जताई गई ऐ। कुपवाड़ा- बांडीपोरा ते गांदरबल दे किश हिस्सें च 21 दिसम्बर गी दरम्याने शा भारी बर्फबारी होई सकदी ऐ। इस दौरान मदानी इलाकें च हौली बरखा पौने दी बी मेद ऐ। यात्रियें ते ट्रांस्पोर्टरें गी सलाह दिती जंदी ऐ जे ओह सौगे-सतर्क रौहन ते ट्रैफिक पुलस ते प्रशासनिक दिशा-निर्देशों दी पालमा करन। मौसम विभाग दे इक अधिकारी नै होर जानकारी दिंदे होई दस्सेया.

<><><><><><>